



O martes 7 de maio, ás 20:00h, o club de lectura Sete Vidas, de Espazo Lectura, reunirase de novo na Biblioteca de Gondomar para falar da lectura recomendada para este mes. Trátase da obra *Os xardíns de Mulai Abdalá*, do escritor e reporteiro suízo, André Kaminski, editada pola editorial Rinoceronte. A versión orixinal en alemán foi levada ao galego pola tradutora Ana María Abeleira Liste, residente na Suíza.

Sinopse da novela

Ó longo das nove vivencias deste libro, André Kaminski móstranos que a realidade é moito máis vasta do que aparenta ser. O eivado que rexenta un bordel perdido no deserto quizais sexa un heroe de guerra, un mecánico de motores orixinario da Alsacia desvélase como o rexente de gran parte da África Ecuatorial, e un servente que aparenta ser un espía convértese no mellor aliado nas situacións límite.

André Kaminski escribe e describe todo o que presenza coa mirada obxectiva dun reporteiro; só así é posible mirar detrás da máscara africana e descubrir a verdadeira esencia deste misterioso continente.

O autor

O escritor e pensador de orixe xudía André Kaminski (Xenebra, 1923) doutorouse en Filosofía, foi guionista de televisión, autor de pezas de teatro e reporteiro. Ademais de ser un estudoso da historia da igrexa, escribiu as novelas *Kith e Kin*, *O ano que vén en Xerusalén* e *Kiebitz*, onde narra a fin da utopía socialista. Pasou varios anos en África Ecuatorial e África do Norte, primeiro como reporteiro e logo dirixindo películas. Esta experiencia foi o xerme dos relatos contidos en

Os xardíns de Mulai Abdalá

. Morreu en Zürich no ano 1991.